
Қўл жанги мусобақаси ғолиблари

Фарғона олимпия заҳиралари коллежида 28-30 май кунлари Ўзбекистон Республикаси Ички ишлар вазирлигининг терма жамоалари ўртасида қўл жанги бўйича мусобақа бўлиб ўтди. Иштирокчилар 60-90 киллограммдан юқори бўлган вазнда куч синашдилар.

Мусобақанинг очилиш маросимида вилоят ҳокими Ш.Ғаниев иштирок этди ва сўзга чиқди.

– Юртимиз ва шахсий ҳаётимиз тинчлигини таъминлаш, фарзандларимиз келажагини ёт кучлардан асрашда ички ишлар ходимларининг ўрни бекиёс. Халқимизнинг эртанги куни, тараққиёти учун бурч ва вазифаларини сидқидилдан адо этадиган мутахассисларнинг юксак жисмоний тайёргарлиги ўта муҳим саналади. Уларнинг оила, маҳалла, жамиятда соғлом муҳитни қарор топтириш, ҳуқуқбузарликларга қарши курашиш, фуқаролар хавфсизлигини таъминлаш ва ишончини оқлашда омад тилаймиз, – дейди вилоят ҳокими.

Соҳа вакилларининг ўқув машқлари, жанговор тайёргарлигини намоён этувчи чиқишлари қарсақлар билан кутиб олинди.

– 7 йилдан буён қўл жанги билан шуғулланаман. Мамлакатимиз ва Осиё чемпионатларида иштирок этиб, 7 та олтин медални қўлга киритдим, – дейди жиззахлик Ботир Бозоров. – Спорт фаолиятимизнинг асосини ташкил этади. Жамоамиздаги 9 нафар вакилларнинг ҳар бири соҳада кўплаб ютуқларга эришган. Энг катта ютуғимиз Ватанимиз тинчлигини таъминлаш, фаровонлиги учун хизмат қилаётганлигимиздир.

Мусобақа ғолибларини тақдирлаш тадбири Ислон Каримов номидаги вилоят Театр-концерт саройида ўтказилди.

Иштирокчилар эътиборига ички ишлар вазирлиги томонидан тайёрланган видеоролик намоиш этилди.

Мусобақада 1-ўринни ИИБ Қоравул қўшинлари бош бошқармаси терма жамоасидан Муса Маметов (60 кг), Бобир Рахматов (85 кг), Сардор Шовриков (90 килограммдан юқори) Сурхондарё вилояти ИИБ терма жамоаси вакили Шахзод Азизов (65кг), Фарғона вилояти ИИБ терма жамоаси аъзолари Нозимжон Эминжонов (70 кг), Бобиржон Хомидов (75 кг), Наманган вилояти ИИБ терма жамоаси вакили Жасур Солижонов (80 кг), Қорақолпоғистон Республикаси Ички ишлар вазирлиги терма жамоасидан Шермухамбед Ходжаниязов (90 кг) қўлга киритдилар.

Умумжамоа ҳисобида 1-ўринни ИИБ Қоровул қўшинлари бош бошқармаси терма жамоаси, 2-ўринни Қорақолпоғистон Республикаси ИИБ терма жамоаси, 3-ўринни Фарғона ҳамда Сурхондарё вилояти ИИБ терма жамоалари эгаллади.

“Энг яхши иштирокчи” номинацияси бўйича Фарғона вилояти ИИБ вакили Ислон Марупов, “Ғалабага бўлган интилиш учун” номинациясида ИИБ Халқаро аэропортларда хавфсизлигини таъминлаш қўшини бош бошқармасидан Асилбек Олимов, “Одилона ҳакамлик қилгани учун” номинациясида халқаро тоифадаги ҳакам Маҳмуд Суяров тақдирландилар.

Ғолибларга диплом ва қимматбаҳо совғалар топширилди.

Тадбир давомида Ўзбекистонда хизмат кўрсатган артистлар Абдулхай Каримов, Қиличбек Тожиев, хонандалар – Баҳодир Мамажонов, Отабек Муҳаммадзоҳид, Тохир Шокиров, Ойбек Холбоев томонидан янграган дилбар қўшиқлар барчага кўтаринки кайфият улашди.

Тадбирда вилоят ИИБ бошлиғи, полковник Раҳматжон Маматов, вилоят ҳокими ўринбосари И. Носиров иштирок этди.

